

*Il pesce spada anemico
di
Santo Capizzi*

Uomo vestito da pescivendolo, due cassette a formare un banco abusivo.

PESC: ‘sta crisi m’abbiavu che pedi all’aria! Gia’ st’euru m’ava sciancatu, ci voleva sulu ‘sta crisi internazionalistica pi rumpirimi i jammi completamenti, fu a botta finali. Ju avevu u me bellu postu di parcheggiatori liberu professionista, stipendio discretuccio e sicuru, ouh a un certo punto a genti non si misi ‘nda testa ca non voleva chiu’ pavari? Di puntu in biancu m’attruvai disoccupatu, allura pinsai, Jaffio chista e’ a vota bona ca addiventi imprenditori. Chi fici allura, quantu tris imani fa accattai stu bellu pisci spada e mi grapi’ ‘sta casa do pisci. Mi dissi, ora ti vinni ‘stu bellu pisci e ti metti in paghia! Ma quali? ‘Nda tri simani su n’hau vinnutu 3 kila sunu assai. Cca’ su non mi dignu ‘na mossa appizzu fruttu e capitali, m’hau a spicciari a vinirammillu pirchi’ ‘sta accumulianu a svumicari ‘n fetu!

Passa un signore anziano che va per la sua strada.

PESC: senta, senta lei, capo, rrriiii, capo e lei dico!

ANS: l’havi cu mia?

PESC: cui ju?

ANS: e cui allura me soru? Mi ‘ntisi chiamari!

PESC: ju non haiu parratu! Forsi potti essiri Gennaru.

ANS: e cu e’ gennaru?

PESC: cca’ ce lo rappresento (*indica il pesce*) Gennaro Spada.

ANS: cui u pisci? Ma chi mi sta pighianu in giro? Un pisci ca parra?

PESC: (*ridendo*) parra? Parra? A ‘sta matina quannu u pighiai o scabellu stava facennu un cumiziu, l’appa a tirari di forza.

ANS: a ‘sta matina? Chistu almenu almenu havi ca e’ cadaveri ‘dui simana.

PESC: e picca e’!

ANS: comu?

PESC: no dicu, ‘na simana? Ma chi va dicennu vossia. Ci dicu ca u pighiai a ‘sta matina ca si stava facennu ‘na discutruta cu un tunnu; pi astutallu c’appa a dari na cuzzata cu ‘n mazzolu.

ANS: ma chi dici ma si c’havi l’occhi ca parunu slavati.

PESC: (*come commosso*) cataratta. Ci ha suffertu sempri u figliu. Havi di nicu nicu ca soffri di cataratta.

ANS: chi cataratta? Un pisci?

PESC: e chi fussi a prima vota?

ANS: veramenti mai l'haju sintutu. Comunque passa p'a cataratta, ma chi mi voli diri ca un pisci friscu havi 'stu culuri pallidu allattamatu.

PESC: anemia mediterranea.

ANS: chi anemia mediterranea?

PESC: ca certu. Ci manca tannicchiedda di ferru, ma non si preoccupassi sta facennu a cura, pigghia du fialetti di vitamini, una prima e una dopu i pasti.

ANS: e quantu n'havi puvureddu! A cataratta, l'anemia, e cumminatu peggio di mia puvureddu.

PESC: eh mischinazzu, ha avuto un'infanzia difficili. Ma non si preoccupassi ora criscennu s'abbessa.

ANS: e 'sti macchi nivuru chi sunu?

PESC: (*come disdegnato*) non mi dicissi nenti pi favuri! Ca quantu tri jorna fa, non ci ficiunu una rapina e ci desunu 'na fraccata di lignati?

ANS: 'na rapina o pisci spata?

PESC: a no? Era tranquillu ca passava po strittu di Messina quannu du squali matelici u femmunu e ci fannu: senta du gean nasu chi e' tutti do so? Iddu giustamente ci arrispunnivu: no, mita' e' di to soru! E iddu u fraccanu!

ANS: nenti di menu! E 'sti pustuli allura chi sunu causa de feriti?

PESC: una dermatite. Una dermatite cronica causata dall'acqua fitusa do mari. Ma non si preoccupassi ci fricu una crema tri voti o jornu. Mi dissi u dermatologu ca 'ndo giru di 'na simana ci passa.

ANS: u figliu e quantu n'a sumputtatu, mi sta facennu quasi tenerezza.

PESC: e chi mi dici a mia, allura ju ca havi dui simani ca u addevu?

ANS: ma comu dici ca u accattavu a 'sta matina.

PESC: certu u accattai a 'sta matina, ma prima ni jevumu sintennu pi telefonu. Pi mia oramai e' comu a unu di famiglia; dicemu va ca oramai mi sono affezionato.

ANS: e u capisciu, uno a l'animali ci si affeziona e non si ci vulissi separari mai mancu pi tuttu l'oru do munnu.

PESC: (*tono affezionato*) vistu ca lei mi capisci, mancu pi tuttu l'oru do munnu. (*Tono distaccato*) Chi fa chi u ammoghju tuttu?

ANS: tuttu? Tuttu e' assai! Ma sintissi 'na cosa, lei e ' propriu sicura ca 'stu pisci e' friscu?

PESC: friscu? frischissimi! Senta vossia unni abita.

ANS: ju a San Giovanni Gelermu.

PESC: si issa a fari u restu da spisa, quannu torna a casa u attrova dda. Veni sulu, a pedi.

ANS: ma senta, macari ca ju mu vulissi accattari, vulissi cridi ca e' friscu, sugnu preoccupatu pi tutti sti cosi ca c'havi: a cataratta, l'amenia, u mulinciani, a dermatiti.

PESC: lei ha stari sulu tranaquillu, non ci sono pobleme. (*Enfatizzando*) ci u ammoghiu cu tutti i medicinali!

FINE

Note:

PESC: pescivendolo. Abbigliamento caratteristico.

ANS: uomo anziano

Santo Capizzi
Cell. 347 80 60 577
santocapizzi1@alice.it

Questa storia è semplicemente frutto della fantasia, pertanto ogni riferimento a persone, fatti e luoghi è del tutto casuale.